

Radyo an Norvys

(<http://www.dasunys.net/podcast.htm>)

Titel: Nowodhow an seythun (03/10/07)

Auctour: Matthew Clarke

Dydh: 3 Hedra 2007

Pesyans: 5:01

Matthew Clarke ov vy gans golok nowodhow and seythun yw passyes.

Kampyorieth An Bys Sawya Bywnans a dheu dhe Gernow yn diw-vil-ha-deg.

Y fydh an gwariow synsys war dreth Fistral hag y fydh poll neuvya Olympek servadow drehevys ena.

Ordenoryon a grys bos hwegh mil a ombrofyer dres dhe'n hwarvos a-dhiworth hanter kans pow.

Kaderyer an gwariow yw Jonathon Ball... kes-selyer an Edenva.

Dell grys ev, chons da vydh dhe wul agan merk war an bys sport diw vlydhen kyns Olympiad Loundres.

Y fydh Krofti Dheghow y'n Lys Ughel nessa blydhen erbynn Konsel Keryer.

Perghennoryon an bal a grys an konsel dhe oberi a-barth Dastisplegyans KPR, hag yw tuek.

Ny vynn soedhogyon an konsel kewsel genen.

Yma moy a boen dhe diogyon awos bos kleves miles nowydh yn Breten Veur.

Taves Glas re beu kevys yn Suffolk... dres gans kelyon.

Byttegyns, skila pella a omserri yw wosa kleves karn ha min.

Euthek kales yw dhe diogyon Gernewek gwertha na gwarthek na deveys y'n eur ma.

Yma rol a beswarthek skol warn ugens gans Konsel Kernow hag edhomm dhedha a'ga degea.

Y teu an nowodhow ma warlergh a dhegeans skol gynsa Lanreath.

An konsel a lever nag eus ervirans hwath.

An peswardhekves a vis Hedra... dydh a guntellyans dhe-les yn Kernow.

Kernewegoryon a guntell dhe Dremogh... le may fydh derivas a-dro dhe'n form soedhogyl Kernewek.

Soedhek an taves Jenefer Lowe a lever na vydh chons a votya ena...

[CLIP]

Govenek yma dhe Jenefer bos Kernewegoryon dhe synsi breus an kessedhek gans reowta...

[CLIP]

Mirewgh orth kedhlow war wiasva Maga mar mynnowgh godhvos moy.

Yth eson ow mires orth an rugbi lemmyn.

Nowodhow splann dhe'n Vorladron.

I eth dhe Newbury ha'ga fetha eth-poynt-ha-dew-ugens dhe eth-warn-ugens.

Warlergh skoedhoryon an para... yma'n Gernowyon ow tos ha bos gwell oll an prys.

Nyns o mar dha rag an Para Oll-Du an bennseythun yw passyes.

Moseley a dheuth dhe Bons Polson ha gwaynya pypmp-poynt-warn-ugens dhe dheg.

Ha Rysrudh eth dhe Gargront rag hanter gwari.

An para a erviras gasa an fit orth hanter-termyn wosa taklow personnek kepar ha bysow demmedhyans dhe vos ledrys dhiworta.

Ny vynnas an warioryon pesya y'n nessa hanter... hag yma an awtorita rugbi ow prederi a-dro dhe'ga hessydhya.

Gwiasva selys gans studhyor dhiworth Tewynn Bleustri re gachyas les a dus a-hys Breten Veur.

Porthemmet-namm-kom a wormeul treth nevek yn Kernow... henwys Porthemmet.

Havysi re dheuth dhe Gernow yn unn hwilas an tyller ma... heb y gavoës.

An praga? Ny yllir y gavoës drefenn nag yw treth gwir!

Pennrewloryon tournyaseth a grys bos an wiasva da awos hi dhe lesa bri agan pow.

Nebes erell a grys bos gwell skonya an wiasva drefenn bos gokki.

Yn mysk an skrif war linenn yw bos an balores gelwys 'koff' yn Sowsnek, styr a 'giss on' yw 'henn yw marthus'... hag y hyllir kavoës Porthemmet dre lywya a-hys an a-deg-warn-ugens a-gledhbarth.

Ha henn yw diwedh an nowodhow seythunweyth... bys yn nessa prys.